

TULAFONO TAU FAAOFI O TEUTEUGA O LE TULAFONO O SOLITULAFONO 2017

SAMOA

Faamatalaga e Faamalamalama ai


1.0 Sini ma mafuaaga:

- 1.1 Ua taumafai le Tulafono Tau Faaofi e teuteu le Tulafono o Solitulafono 2013 e ala i le faaofiina i ai o le Vaega 9A fou, mo solitulafono e faasaga i le tauleleia o le igoa o se tagata. O le soligatulafono ua faaofiina i lalo o lenei Vaega e faapea, "Faamatalaga sese ua mafua ai le faaleagaina o le tauleleia o le igoa o se tagata". O le mafuaaga autu mo le faaofiina o le soligatulafono, o le faailoa lea o tulaga faaleagaina ua faia e faasaga i le tauleleia o le igoa o se tagata, e se isi tagata, o ia lea ua na lomia faasalalau se faamatalaga sese e faatatau i lena tagata.
- 1.2 O lenei tulaga e tutusa lava ma faiga tau faaleaga, ma e ui lava o tualumaga tau le va o tagata mo faiga tau faaleaga o lo o avanoa i ai tagata lautele, ae o le mea moni lava ia, e le o tagata Samoa uma e avanoa i ai i nei tualumaga, ona e le o tagata uma latou te mafaia ona totogiina auaunaga tau loia e manaomia mo ia tualumaga.
- 1.3 O le mafaufauga lea ua afua ai ona faaofi lenei soligatulafono i totonu o le Tulafono o Solitulafono 2013, ina ia faatagaina ai so o se sui o tagata lautele, ia maua o avanoa i faiga o faamasinoga tonu tau solitulafono, i le tagofia ai o mafatiaga i tulaga faaleagaina e tusa ai o faamatalaga sese ua lomia faasalalau.

Fuaiupu:

Fuaiupu 1: - ua aiaia ai mo le igoa puupuu ma le amataga.

Fuaiupu 2: - ua aiaia ai mo le faaofiina o le Vaega 9A fou faatasi ai ma se fuaiupu 117A fou lea ua aiaia ai e faapea o se tagata o ia lea ua lomia faasalalau se faamatalaga sese ma e faatatau i se isi tagata ma le faamoemoe e faaleagaina ai le tauleleia o le igoa o lea tagata, ua na faia o se soligatulafono.



.....

(Hon TUILAEP Auelua Fatialofa Lupesoliai Lolofietele
Neioti Aiono Galumalemana Dr. Sailele Malielegai)

PALEMIA

**TULAFONO TAU FAAOFI O TEUTEUGA
O LE TULAFONO O SOLITULAFONO 2017**

SAMOA

Faatulagaina o Aiaiga

1. Igoa puupuu ma le amataga
2. Ua faaofiina le Vaega 9A fou

2017, Nu.

O SE TULAFONO TAU FAAOFI UA TAUA

O SE TULAFONO e teuteu ai le Tulafono o Solitulafono 2013 (“Tulafono Autu”) ma isi faamoemoega e fesootai i ai.

UA FAIA e le Fono Aoao Faitulafono a Samoa i totonu o le Palemene ua potopoto e faapea:

1. Igoa puupuu ma le amataga:

- (1) E mafai ona taua lenei Tulafono o le Tulafono o Teuteuga o le Tulafono o Solitulafono 2017.
- (2) O lenei Tulafono e amata faamamaluina i le aso e tuuina i ai le maliega a le O Le Ao o le Malo.

2. Ua faaofiina le Vaega 9A fou:

Ua teuteuina le Tulafono Autu e ala i le faaofiina o se Vaega 9A fou i le tuanai ai o le fuaiupu 117 e faapea:

**“VAEGA 9A
SOLITULAFONO E FAASAGA I LE
TAULELEIA O LE IGOA O SE TAGATA**

117A. Faamatalaga sese ua mafua ai le faaleagaina o le tauleleia o le igoa o se tagata:

- (1) Ua faia e se tagata se soligatulafono, o ia lea ua lomia faasalalau i so o se faiga, o faamatalaga:
 - (a) e faatatau i se isi tagata;
 - (b) lea e sese;
 - (c) ma le faamoemoe e faapogai ai se tulaga faaleagaina o le tauleleia o le igoa o lena tagata.
- (2) O lea tulaga o se tetee i lalo o lenei fuaiupu pe afai e sa’o le faamatalaga ua lomia faasalalau.
- (3) O se tagata o ia lea ua faia se solitulafono i lalo o lenei fuaiupu ua noatia i luga o se moliaga ua faamaonia faaletulano i se sala tupe e lē silia le 175 iunite tau faasalaga po o le nofosala i le falepuipui mo se vaitaimi e lē silia le tolu (3) masina.”.
